

# UTHM Johan Debat Piala Menteri Besar Johor

**M**ENYEDARI kepentingan debat dalam melahirkan mahasiswa yang berintegriti dan mempunyai kemahiran insaniah yang tinggi, Kolej Kediaman Tun Syed Nasir (KKTSN), Universiti Tun Hussein Onn Malaysia (UTHM) dengan kerjasama Institut Integriti Kepimpinan dan Latihan Semangat Dato' Onn (IKLAS) telah menganjurkan Pertandingan Debat Piala Menteri Besar Johor 2016 baru-baru ini.

Pertandingan yang berlangsung di Kampus Induk UTHM, Batu Pahat ini telah menobatkan pasukan tuan rumah selaku juara setelah berjaya menewaskan pasukan lawan, Institut Pendidikan Guru Kampus Temenggung Ibrahim dalam pertandingan akhir dengan usul "Bajet Johor 2016: Menjunjung Kemodenan Johor."

Pasukan UTHM yang diwakili Muhammad Ikhmal Siddiq Jefri Din, Siti Khadijah Dermawan, Muhammad Amir Ruzi dan Kanthan A/L Theva Kumaran berjaya membawa pulang hadiah wang tunai RM2,000, piala iringan dan sijil penyertaan.

Lebih membanggakan, Muhammad Ikhmal Siddiq yang juga penghuni Kolej Kediaman Tun Syed Nasir telah dinobatkan sebagai Pendebat Terbaik pertandingan akhir.

Hadiah kepada pemenang disampaikan oleh Ketua Pegawai Eksekutif IKLAS, Johan Arifin Mohd. Ropi.

Yang turut hadir wakil rasmi Timbalan Naib Canselor (Hal Ehwal Pelajar) UTHM, Azlan Wanti.

Bertemakan "Johor Berkemajuan",

pertandingan ini melibatkan 20 pasukan daripada institut pengajian tinggi seluruh negeri Johor termasuk Universiti Teknologi Malaysia (UTM), Universiti Kuala Lumpur (UniKL), Kolej Polytech Mara dan Institut-Institut Pendidikan Guru.

Pengarah Program, Amirul Faiz Abdul Latif berkata, pertandingan ini merupakan satu platform yang baik bagi mencungkil

bakat mahasiswa di samping membentuk keperibadian murni yang penuh dengan ciri-ciri kepimpinan.

Malah katanya, melalui debat juga para mahasiswa turut didedahkan dengan pelbagai isu semasa dan fakta menerusi usul yang melibatkan isu-isu terkini yang berlaku di dalam mahupun di luar negara.

Sementara itu, Pengetua Kolej

Kediaman Tun Syed Nasir, Dr. Mohd. Halim Irwan Ibrahim pula berkata, pertandingan seumpama ini mampu melahirkan mahasiswa yang berfikiran kritis dan kreatif melalui pembentangan usul yang dikemukakan.

"Menerusi debat ini, kita berharap agar para mahasiswa dapat memperoleh input yang berkesan," katanya.

**JOHAN ARIFIN MOHD. ROPI (berdiri, tiga dari kiri) bersama-sama pemenang Pertandingan Debat Piala Menteri Besar Johor 2016 di UTHM, Batu Pahat, baru-baru ini.**

